



Cusseglie nazional Martin Candinas (sen.) e cusseglie guvernativ Marcus Caduff han tagliau la sonda il pin del sco simbol per l'avertura dalla sonda d'aventuras NEAT a Sedrun.

FOTOS HANS HUONDER

«Nus duvrein buc in Disneyland ni ina tuor d'Eiffel»

Quater onns ein spirai dapi che l'idea d'ina sonda d'aventuras davart la NEAT en Val Tujetsch ei naschida. Ussa eis ella realitad e perspuenter han ils iniziants culla presidenta Gelgia Deplaz obteniu bia laud all'avertura uffiziala da quella nova purschida.

HANS HUONDER/FMR

«20 onns ei il menaschi dalla NEAT staus omnipresents ella Val Tujetsch. Quei temps e tut quei ch'ei stau cumbinau cul denterplazzal havein nus buca vuliu schar passar mo aschia.» Cun quels plaids ha *Gelgia Deplaz* beneventau la sonda avon miezdi in tschuppel hosps all'avertura dalla nova sonda d'aventuras dalla NEAT. NEATural – l'unioni fundada per realisar quella sonda – seigi loscha dil contonschiu: «Igl ei ina purschida turistica supplementara.» Sin dudisch staziuns vegn intermediau biaras informaziuns davart la construcziun dil tunnel da basa, la geologia, mo era il svilup dalla val en quei temps, la fauna e flora. Otg da quellas staziuns san era vegnir visitadas igl unviern. Culla vischnaunca ha l'uni-

un ina cunvegnientscha davart il manteniment dalla sonda e sia infrastruttura. 780 000 francs ha quell'ovra custau. Tenor Gelgia Deplaz maunca aunc enqual franc per puder cuvierer cumpleinamein quella grond'investiziun. Communabla-mein cun *Prisca Berther*, *Placi Berther*, *Ervin Monn* e *Peter Koemeter* seigi ei reussiu ad ella da realisar in'ovra sco segn da regardientscha alla NEAT.

«Ei drova narrs e fantasts»

Cura ch'enzatgi vegn cun in'idea empau speciala vegn el spert numnaus narrs. Cura ch'ei vegn lu denton inaugurau ein tuts dil meini che quei seigi stau ina super idea», di il president communal *Martin Cavegn*. El hagi respect dalla prestaziun dils iniziants e surtut era

ch'ei seigi reussiu ad els da segirar la finanziaziun. Ussa hagi ei denton num far enconuscenta la sonda – far gust da visitar ella: «Glied che ha ideas duess ins adina sustener. Per quei motiv appelleschel jeu a tuts d'esser empau narrs e fantasts.» Cusseglie guvernativ *Marcus Caduff* ch'ei s'engaschaus pil project dalla sonda el rom dil Program San Gottardo, puntuescha: «Nus duvrein buc in Disneyland ni ina tuor Eiffel. Tujetsch ei predestinau da raquinter la historia dalla NEAT. Quei sa mo Tujetsch, tgei lein nus aunc dapli.» Il minister d'economia e fatgs socials dil Grischun puntuescha: «L'iniziativa – sco quella cheu – sto vegnir dalla basa. Il cantun sa lu gidar a realisar ella.» Sper il cusseglie nazional *Martin Candinas* ein dil remi-



«Tgisà, forsa daventa la colligaziun dalla regiun cul tunnel da basa tuttina aunc realitad in mument.»

nent treis anteriurs commembers dil parlament federal stai presents la sonda. *Brigitta Gadiant, Vreni Müller-Hemmi e Dumeni Columberg* ein stai engaschai politicamein sin plaun federal duront il temps dalla NEAT. Ed in messadi digl anteriur cusseglier federal *Adolf Ogi* – in dils protagonistis principals digl Alp-Transit – ei staus da veser e d'udir sin in dils dudisch posts.

Vegnius cun s. Barla

Ina dallas persunas ch'enconuscha fetg bein il menaschi dalla construcziun dil tunnel da basa dil Gottard ei *Christian Krauer*. El ei staus meinaplazzal a Sedrun ed all'avertura dalla senda d'aventuras eis el vegnius cun ina statua da s. Barla sut bratsch. Buca per nuot: «S. Barla ei la patruna dils miniers. La statua steva all'entrada ella galleria dil tunnel e mintga minier che mava leu sperasora mirava sin ella – cul vegneva e cul mava.» La construcziun dil tunnel da basa seigi stada ina fetg gronda sfida: «80 pertschien dils rodond 2400 luvvers ch'ei stai engaschai vid quell'ovra eran digl exteriur. Senza els fuss il tunnel aunc adina buca finius.» Cun quell'ovra hagi la Svizra teniu sias empermischuns enviers l'Europa, luvrau sil termin fixau e pagau senza la transversala da viafier. Ina tierza dil material cavaus ord il grep seigi vegnius nezegiaus per baghegiar il tunnel niev: «Il lag da Claus dess ei buca, sche nus havessen buca giu la caschun da cavar supplementarmein 1400 meters tunnel ed aschia deponer quei material a Surrein.» D'ina biala porschida turistica supplementara ha la directura da Sedrun Mustér Turissem, *Simona Barmettler*, plidau la sonda avonmiezdi all'avertura a Surrein. Quella seigi realitad tshun onns suenter l'avertura dil tunnel da basa: «Nus astgein beneventar en nosa destinaziun scolas, camps, famiglias e hosps individuals. Quella senda porscha enza tgei ad in e scadin.» Dend in sguard el futur puntuescha *Simona Barmettler*:



Christian Krauer ha relatau enqual detagl dalla construcziun dil tunnel da basa dil Gottard. Seniester *Prisca Berther* e *Gelgia Deplaz* dalla suprastonza dall'Unìun NEATural.